

Date – 27/01/2026
Time - 7:30 -7:40 Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Larsap Gen. Vijay Kumar Singh an Mizoram chu hmarchhak state zinga tourism-a thang duangber pawl a ni a ti.
2. Kumin Republic Day-ah Police, Fire & Emergency Services leh Mizoram Home Guard & Civil Defence hnathawk thate hnenah Larsap-in chawimawina a hlan.
3. Nimin khan ramchhunga Republic Day lawmna pui ber chu President Droupadi Murmu-i hovin New Delhi-a Kartavya Path-ah neih a ni
4. Prime Minister Narendra Modia chuan vawiin hian India Energy Week (IEW) 2026 conclave South Goa-ah a hawng dawn.

<><><>

R-DAY

Larsap Gen. Vijay Kumar Singh an Mizoram chu hmarchhak state zinga tourism-a thang duangber pawl a ni a ti.

Ram Danpui hman tan ni, Republic Day vawi 77-na chu nimin tuk khan Mizoram hmun hrang hrangah lawm a ni a, a lawmna pui ber Aizawlah chuan Lammualah hova hman a ni a, thusawiin kum 2024-2025 chhung khan Mizoramah khualzin nuai 5 chuang rawn lutin, khualzin rawn lut hi za zela 139 in a pung a, kum 2025-2026 ah pawh pun belh zelin October 2025 thleng khan khualzin nuai 4 chhinchhiah tawh a ni a ti a. Art & Culture Department bultumin Zokhua, Falkawnah pipute khawsak dan leh nunphung pholanna Live Museum buatsaih a ni a. Hei hian tualchhung mite leh thalaite tana sum lakluhna hnar a siam a, zinmite'n Mizo kutchhuak an lei theih mai bakah Mizo nihna leh hnam ziarang chawilar na'n a pawimawh hle tih a sawi a ni.

Larsap chuan Mizoram tana mellung pawimawh tak, Bairabi-Sairang rel kawng thar chu India Prime Minister Pu Narendra Modi chuan nikum September 13 khan hawngin, Mizoram khawpui, Aizawl kawtkai a rel rawn lut hmasa ber niin, rel rawn lut chuan zin hunchhung a ti tawi a, bungraw lakluh man a ti tlawm a, sumdawnna, khualzin hip leh eizawnna lamah kawng nasa takin a hawng dawn a ni, a ti.

Larsap hian India hnam puanzar pawtparhin parade contingent 23 te'n hnam puanzar zahna chibai an buk chu a chhanglet a. Hemi hnu hian Republic Day puala thuchah sawiin, Mizoram mipuite chu Republic Day vawi 77-na pualin chibai a buk a, India khua leh tui zawng zawngin dikna, zalenna leh intluktlanna an lo neih theih na'n Ram Danpui chu hman a ni a ti a. Larsap chuan Mizoram sorkar flagship programme, Bana Kaih (Hand Holding) Scheme chuan a thawh hnihna a thleng tawh a, mi tam takin tanpuina an dawng tawh a, Chief Minister's Special Package Grant hnuaiah pawh sum sem a ni tawh a ti.



R-DAY MEDALS

Kumin Republic Day-ah Police, Fire & Emergency Services leh Mizoram Home Guard & Civil Defence hnathawk thate hnenah Larsap-in chawimawina a hlan a ni.

Larsap chuan nikum 2025 Independence Day-a President's Police Medal for Distinguished Service dawng tura puan 3rd Bn MAP, Commandant, Pu Lalringdika, Police Medal for Meritorious Service dawng tura puan - Sr. Traffic SP, Pu Stephen Lalrinawma, 3rd Bn MAP Inspector, Pu TC Zothansanga, Fire Fighter pahnih Pu Laldanzira leh Pu Lalmangaiha Colney, Company Sergeant Major pahnih Pu R. Pachhunga, leh Pu J. Laldenga te hnenah chawimawina a hlan a.

Governor's Gold Medal chu SI C. Vanlalruata, CID (SB), SI Lalrinpuui Pachau, Aizawl DEF, SI T. Lalthianghlina, Champhai DEF, ASI Lalrinnggheta, Saitual DEF, Naik F. Lalmuankima, 1st Bn. MAP, Const. Zorama, 2nd IR Bn. leh Const. Lalchhuanliana, Champhai DEF te hnenah a hlan a, Governor's Silver Medal chu Inspr. Lucy Zosangzuali, Security Unit, Inspr. Lalrinmawia Colney, Security Unit, SI Zoensanga, Aizawl DEF, ASI H. Lalpekhlua, Saitual DEF leh Const. Joseph L. Hmar, CID (SB) te hnenah a hlan bawk a ni.

Hei bakah hian Larsap chuan khawpui fai intihsiakna lawmman sem chhuakin Urban Towns category-ah Ngopa, Biate leh Tlabung hnenah a hlan a, District Headquarters category-ah Siaha, Saitual leh Khawzawl hnenah a hlan bawk a ni.



ELECTION AWARD

National Voters Day, 2026 Manekshaw Centre, New Delhi-a Pathianni a huaihawtah Mamit District Election Office chu Best Election District hnuaia Model Code of Conduct Implementation and Enforcement chawimawina hlan a ni a. November, 2025 a Dampa assembly bial bye-election zawh taka inthlan leh a kaihhnawih dan zawm leh lekkawh that vanga dawn niin Pi Ethel Rothangpuui, Joint Chief Electoral Officer, Mizoram chuan President, Pi Droupadi Murmu hnen atangin chawimawina hi a dawng a ni.

Mamit District Election Office hian Dampa assembly bial Bye Election neih zawh takah Model Code of Conduct zawm that avanga award hi dawng an ni a. Best District Award dawng thei tura Election Official-te thawhrimna-ah District Election Office, Mamit chuan lawmthu an sawi a ni.



REFUGEES

Home Minister Pu K. Sapdanga chuan Mizorama raltlan tam tak rei tak awm tawhte enkawlna senso atan sorkar laipui-ah tanpuina sum an dil thu a sawi.

Nimina Akashvani Aizawl News a hrilh danin Pu K. Sapdanga chuan raltlante tanpuina atan hian central sorkarah cheng vaibelchhe 5 an dil mek a, buaipui mek a nih thu a sawi a. An sorkar hnu-ah central sorkar chuan

raltlante chhawmdawlna atan hian buhfai cheng vaibelchhe 5 hu leh a pawisa-in cheng vaibelchhe 5 a rawn pek tawh thu a sawi a. An cham rei tawh chungin Mizoram mipuite’n harsa takin an la chhawmdawl hram hram thei niin a sawi a eng chen nge an chhawmdawl zui theih ang tih chu hriat a harsat thu a sawi a. Central sorkar tanpuina an mamawh thu a sawi a ni.

Tun dinhmun hnuhnung berah Myanmar raltlan hi Mizoramah 28,964 an awm mek a. Raltlan awm zat hi a danglam reng a, lo luh belh an awm zeuh thin rualin an awm thinna a ralmuan deuh chuan an kir leh a. Thenkhat, Mizoram ramri hnaiha awmte chu an leilet leh thlawhhma-ah te an han thawk leh thin bawk a, chuvangin awm zat hi a danglam reng a ni. Bangladesh Chittagong Hill Tracts atanga rawn raltlan zat hi a danglam nasa ngai lova, tunah hian mi 2,360 an awm mek a, an awm tamna ber Lawngtlai district-ah mi 2,042 an awm mek a ni.

<><><>

DRUGS SEIZURE

Police te’n Champhai district-ah heroin kg chanve chuang leh methamphetamine kg 11 thelh an man.

Champhai district Zokhawthar Police Station a thawkte chuan Zirtawpni khan Myanmar luhna Gate hnaih Land Customs Station Building bula bungraw dahkhawmna hmunah Myanmar atanga thlai dahna bag te chu an endik a, antam dahna ip 3 chhunga thuhruk heroin ni ngeia hriat an man a. He’ng ip chhung atang hian heroin hawng 39, gram 468 a rit an man a, international market rate-a chhutin cheng nuai 93, sing 6 hu ni a chhut a ni. He tih mek lai hian zawngtah dahna ip atangin Methamphetamine kg 10.818 a rit, mum 90,900, international market rate-a cheng vaibelchhe 1 leh nuai 40 chuang hu an man tel bawk. He’ng ruihhlo te hi a neitu hriat an ni lova, Zokhawthar Police Station ah Narcotic Drugs & Psychotropic Substances Act, 1985 tlawhchhanin thubuai ziahluh a ni a, an chhuizui zel a ni dawn a ni.

Hemi ni vek hian Champhai Police te chuan Khankawn Police Check Gate paltlang tur Maxi Cab pakhat a bag, a hnuailam siam danglam atangin heroin hawng 6, gram 68 a rit, international market rate-a cheng nuai 13 sing 6 hu an man a, ruihhlo neitua puh leh ruihhlo dahna bag neitu, Maxi Cab khalhtu ni bawk Benjamin Lalremliana, kum 38, Champhai Vengsang a cheng ni a inchhal chu an man nghal a ni a, ruihhlo tawlh leh kawl thubuai siamsak a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

MISHAP

Pathianni khan Phullen Vengthar Pastor Bial KTP Conference chhim tura Luangpawng atanga Creta Car thar a kal mi 3 chuanna chu vanduaithlak takin a chesual a, a hmunah mi pahnih an thi.

A hmuna thite hi Car neitu leh khalhtu Lalthansanga Kum 33, Luangpawm leh Lallawmsanga Kum 37 Luangpawm an ni a. Hliam tuar hi Lalnunzira kum 44, Luangpawm a ni. Chetsualna hmun hi Luangpawm atanga km 8-a hla, Raipuar kawr an tih mai, Luangpawm ram chhung kham chhengchhe hmunah niin metre 100 chuang zet motor hi a lum a, a chhe hneh hle. KTP Conference chhim tura kalte hi an kalna tur an thleng lo tih hriain an chhungte ngaihtha lo chuan Pathianni zan dar 9:00 velah zawngin an hnuhma atangin an chesual tih an hre chhuak ta a ni.

Chetsual thu hriat a nih veleh Phullen leh Luangpawm khawtlang hruaitute leh YMA te'n a hmun an pan nghal a, Conference palai kalte pawhin chanchin an hriat veleh chetsualna hmun hi an pan nghal a ni. Mitthi te hi nimin tuk khawvar hlim khan Phuaibuang PHC ah Post Mortem turin lak chhoh an ni a, hliam awm chhun hi Saitual district Hospital panpui nghal niin tun dinhmunah ngaituahawm lutuk a ni lo niin thu kan dawng.

<><><>

REPUBLIC DAY

Nimin khan ramchhunga Republic Day lawmna pui ber chu President Droupadi Murmu-i hovin New Delhi-a Kartavya Path-ah neih a ni a, European Council President, Antonio Costa leh European Commission President, Ursula von der Leyen-te chu khuallian an ni. Hnam puanzar pawh pharh hnuah 105mm Light Field Gun hmangin 21-gun salute neih a ni a, President hian Indian Air Force Group Captain, Shubhanshu Shukla hnenah huaisen chawimawina sang ber, Ashoka Chakra a hlan bawk a ni.

Hei bakah hian ramin hlapuia a neih Vande Mataram kum 150 na puala hun hman a ni a. Ku themthiam mi 150 in an thilsiam chhuah an pholang a ni.

Republic Day hi ramchhunga state leh UT hrang hrng bakah rampawna India mi cheng te bakah sawrkar hmunpuia awm ten an hmang bawk a ni..

<><><>

IEW

Prime Minister Narendra Modia chuan vawiin hian India Energy Week (IEW) 2026 conclave South Goa-ah a hawng dawn. He hunah hian Union Minister of Petroleum and Natural Gas Hardeep Singh Puri, United Arab Emirates' Minister of Industry and Advanced Technology Dr Sultan Ahmed Al Jaber, Canada Minister of Energy and Natural Resources Tim Hodgson te an tel dawn a. Africa, Middle East, Central Asia leh Global South atangin minister senior te tan tel dawn bawk a ni.

<><><>